

1 DI NOVEMBER 2013

A woman with dark hair, wearing a blue long-sleeved top, stands in a dark landscape under a starry night sky. She is looking upwards with a contemplative expression. The background shows a dark horizon with some light clouds.

E Toren di Vigilancia

ANUNCIANDO E REINO DI JEHOVA DIOS

Mentira
Cu Ta Aleha
Hende for di Dios

E REVISTA AKI, *E Toren di Vigilancia*, ta honra Jehova Dios, e Gobernante di universo. Ademas, e ta consola hende cu e bon noticia cu pronto e Reino celestial di Dios lo caba cu tur maldad y haci mundo un paradisijs. E ta anima hende pa pone fe den Hesucristo, kende a muri pa nos por haya bida eterno y kende ta reinando awor como Rey di e Reino di Dios. Desde 1879, Testigonan di Jehova ta publica e revista aki sin interrupcion. E no ta un revista politico. E ta basa riba e siñansanan di Bijbel.

Bo ta desea mas informacion of un estudio di Bijbel gratis na cas?

Si esey ta e caso, bishita e website www.jw.org of manda bo peticion na un di e adresnan akibou.

For the UNITED STATES OF AMERICA:
Jehovah's Witnesses
25 Columbia Heights
Brooklyn, NY 11201-2483

For CANADA:
Jehovah's Witnesses
PO Box 4100
Georgetown, ON L7G 4Y4

Pa ARUBA, BONEIRO y CORSOU:
Testigonan di Jehova
PO Box 8150
Willemstad, Curaçao

Pa un lista completo di adres na otro parti di mundo, wak www.jw.org/contact.

E publicacion aki no ta pa vende. E ta parti di un obra mundial di educacion biblico sosteni pa donacion boluntario. Den e publicacion aki, e textonan di e Escritura Hebreo ta saca for di *Beibel Santu*. Caminda tin e letternan NW tras di un texto, e ta traduci for di e *Traduccion di Mundo Nobo di e Santo Escritura (Cu Referencia)* na Ingles. E textonan di e Escritura Griego ta saca for di e *Tradukshon di Mundo Nobo di e Skritura Griego Kristian*. Ora tin BPK tras di un texto, e ta saca for di *Beibel na papiamentu koriente*.

The Watchtower (ISSN 0043-1087) is published semimonthly by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 25 Columbia Heights, Brooklyn, NY 11201-2483, and by Watch Tower Bible and Tract Society of Canada, PO Box 4100, Georgetown, ON L7G 4Y4. Periodicals Postage Paid at Brooklyn, NY, and at additional mailing offices. **POSTMASTER:** Send address changes to Watchtower, 1000 Red Mills Road, Wallkill, NY 12589-3299. © 2013 Watch Tower Bible and Tract Society of Pennsylvania. All rights reserved. Printed in Canada.

TOPICO PRINCIPAL

Mentira Cu Ta Aleha Hende for di Dios

 PAGINA 3-7

Ta Imposibel pa Stima Dios? 3

E Mentira Cu Dios No Tin un Number 4

E Mentira Cu Dios Ta un Misterio 5

E Mentira Cu Dios Ta Cruel 6

E Berdad Por Haci Bo Liber 7

DEN E EDICION AKI TIN TAMBE

Conseho pa un Bida di Famia Feliz

—Papia cu Bo Yiu Adolescente sin Discuti cu Ne 8

Hala Cerca Dios

—Dios Ta Recompensa Hende Cu Ta Haci Esfuerso pa Busc'e 11

Imita Nan Fe

—Dios A 'Declar'e Husto pa Medio di Obra' 12

Pregunta Cu Bijbel Ta Contesta 16



LESA MAS ARTICULO ONLINE | www.jw.org



FREQUENTLY ASKED QUESTIONS ABOUT JEHOVAH'S WITNESSES

—Do You Believe That You Have the One True Religion?

(Bay na ABOUT US > FREQUENTLY ASKED QUESTIONS)

DOWNLOAD E REVISTA AKI
ONLINE, DISPONIBEL NA
VARIOS IDIOMA



Ariba, trinidad: Museo Bardini, Florence;
meymey, fierno: © Photononstop/Superstock



Ta Imposibel pa Stima Dios?

“‘Stima Jehova bo Dios cu henter bo curason, cu henter bo alma y cu henter bo mente.’ Esaki ta e mandamento di mas grandi y esun di prome.”—**Hesucristo**, aña 33 di prome siglo.*

Tin hende ta haya cu ta dificil pa stima Dios. Pa nan, e ta un ser misterioso, indiferente y hasta cruel. Wak kico algun di nan a bisa:

“Mi tabata resa pidi Dios p’e yuda mi, pero na mes momento mi tabata sinti cu e ta masha leu for di mi, casi imposibel pa yega na dje. Pa ami, Dios tabata un ser desconoci y sin sintimento.”—**Marco**, Italia.

“Aunke di curason mi kier a sirbi Dios, e tabata parece masha leu for di mi. Mi a mir’e como un Dios severo cu ta cla pa castiga hende. Pa ami, e no tabatin sintimento.”—**Rosa**, Guatemala.

“Tempo mi tabata chikito, semper mi a kere cu Dios ta wak nos foutnan pa e castiga nos. Pero despues mi a bin mir’e como un Dios indiferente, manera un prome minister cu ta atende asuntonan di su pueblo, pero cu no ta interesa mes den nan.”—**Raymonde**, Canada.

Kico abo ta pensa? Hende por stima Dios? Pa siglo-nan caba cristiannan ta haci e pregunta ey. Durante Edad Medio mayoria di hende no tabata ni resa mas na e Dios Todopoderoso. Dicon no? Pasobra hende tabatin miedo di dje. Historiador Will Durant a bisa: “Con un simpel pecador por tribi di dirigi su oracion na un trono cu ta asina cruel y leu for di hende?”

Kico a pone hende mira Dios como un ser “cruel y leu for di hende”? Kico Bijbel ta siña realmente tocante Dios? Si bo siña e berdad tocante Dios, esaki lo yuda bo stim’e?

* Mateo 22:37, 38.



Ora hende ta sconde of reemplasa e nomber di Dios, ta comosifuera nan ta cort'e saca for di Bijbel

E Mentira Cu Dios No Tin un Nomber

LOKE HOPI HENDE TA KERE “Nos no a yega na ningun acuerdo encuanto si Dios tin un nomber. Y si e tin un nomber mes, nos no sa kico e nomber ey lo ta.”—Profesor David Cunningham, *Estudio Teologico*.

LOKE BIJBEL TA BISA Dios a declara: “Ami ta [Jehova, NW], esey ta mi nomber.” (Isaias 42:8) Jehova ta un nomber Hebreo cu ta nifica “E Ta Causa pa Bira.”

Jehova kier pa nos uza su nomber. Bijbel ta bisa: “*Invoca su nomber. Haci su echonan conoci entre e pueblonan; haci nan corda cu su nomber ta halsa.*”—Isaias 12:4.

Hesus mes a uza e nomber di Dios. Hesus a bisa su tata den oracion: “Mi a haci bo nomber conoci na nan [Hesus su discipelnan] y lo mi sigui hacie conoci.” Dicon Hesus a siña su discipelnan e nomber di Dios? El a sigui bisa: “Pa nan por demonstra e amor cu bo [Dios] a stima mi cu ne y pa mi por ta den union cu nan.”—Juan 17:26.

DICON ESEY MESTER INTERESA BO E teologo Walter Lowrie a skirbi: “Un hende cu no conoce Dios pa nomber no conoc’e como persona, ni e no por stim’e si e conoc’e solamente como un forsa sin personalidad.”

Un homber cu yama Victor tabata bay misa tur siman, pero e no tabata sinti cu e conoce Dios. El a bisa: “Ora mi a siña cu Dios su nomber ta Jehova, ta comosifuera el a cera conoci cu mi oficialmente. Mi a sinti cu porfin mi a conoce e Persona cu mi a tende asina hopi di dje. El a bira un Persona real pa mi, y mi a cuminsa mir’e como mi amigo.”

Jehova, di su banda, ta hala cerca di hende cu ta uza su nomber. E ta priminti esnan cu conoce su nomber cu lo e no bandona nan tanten cu nan ta busc’e. (Salmo 9:10) Tambe Dios ta bendiciona esnan cu ta invoca su nomber. Bijbel ta bisa: “Tur hende cu invoca e nomber di Jehova lo ser salba.”—Romanonan 10:13.



Museo Bardini, Florence

E Mentira Cu Dios Ta un Misterio

LOKE HOPI HENDE TA KERE “E tres religionnan cristian di mas grandi, esta, religion catolico, ortodox y protestant, ta kere den un Dios cu ta consisti di tres Persona: Dios Tata, Dios Yiu y Dios Spirito Santo. Di acuerdo cu teologia cristian, esaki no ta nifica cu nan ta kere den tres dios, sino cu e tres personanan aki ta basicamente un dios.”—*The New Encyclopædia Britannica*.

LOKE BIJBEL TA BISA Hesus, e Yiu di Dios, nunca a pretende di ta igual of di e mesun substancia cu su Tata. Mas bien, el a bisa: “Mi ta bay cerca e Tata, pasobra e Tata ta mas cu mi.” (Juan 14:28) Tambe el a bisa un di su siguidornan: “Mi ta subi bay cerca mi Tata, cu ta boso Tata tambe, y cerca mi Dios, cu ta boso Dios tambe.”—Juan 20:17.

Spirito santo no ta un persona. E cristiannan di prome siglo “*a yena* cu spirito santo”, y Jehova a bisa: “Lo mi *drama* un poco di mi spirito riba tur sorto di hende.” (Echonan 2:1-4, 17) Spirito santo no ta parti di un Trinidad. Mas bien, e ta Dios su poder den accion.

DICON ESEY MESTER INTERESA BO Segun e teologonan catolico Karl Rahner y Herbert Vorgrimler, ‘hende no por compronde Trinidad sin revelacion, y ni despues di un revelacion nan lo no por comprond’e completamente tampoco.’ Bo por realmente stima un persona cu bo no por conoce ni compronde? Pesey e doctrina di Trinidad ta stroba hende di conoce y stima Dios.

Marco, menciona den e prome articulo, a mira Trinidad como un barera entre e y Dios. El a bisa: “Mi a haya cu Dios tabata sconde su mes pa mi y esey a hacie mas misterioso y dificil pa acerca.” Sinembargo, “Dios no ta un Dios di confusion.” (1 Corintionan 14:33, BS) E no a sconde su identidad pa nos. E kier pa nos conoc’e. Hesus a bisa: “Nos ta adora loke nos conoce.”—Juan 4:22.

Marco a bisa: “Ora mi a siña cu Dios no ta parti di un Trinidad, finalmente mi por a cuminsa forma un relacion personal cu ne.” Si nos mira Jehova como un persona real y no como un persona desconoci y misterioso, ta bira mucho mas facil pa stim’e. Bijbel ta bisa: “Ken cu no ta stima no a siña conoce Dios, pasobra Dios ta amor.”—1 Juan 4:8.



© Photonstop/SuperStock

E Mentira Cu Dios Ta Cruel

LOKE HOPI HENDE TA KERE “E almanan cu ta muri den estado di pica mortal ta baha na fierno inmediatamente despues di morto y ey nan ta sufri pena di fierno, ‘e candela eterno.” (*Catisashi di Iglesia Catolico*) Algun lider religioso ta bisa cu fierno ta un condicion di separacion completo for di Dios.

LOKE BIJBEL TA BISA “E alma cu peca lo *muri*.” (Ezeziel 18:4) “E mortonan no sa nada.” (Eclesiastes 9:5) Pues, si e alma ta muri y e mortonan no ta consciente di nada, con un hende por sufri den “candela eterno” of sinti e dolor di ta pa semper separa for di Dios?

Den Bijbel, e palabranan Griego y Hebreo traduci hopi biaha como “fierno” en realidad ta referi na e graf comun di humanidad. Por ehempel, Bijbel ta referi na un profecia tocante Hesus: “Lo bo no laga mi alma den graf [“fierno”, *E Testament Nobo*].” (Echonan 2:27) Ta bisto cu Hesus no tabata den un luga di tormento of aleha for di Dios, sino den graf.

DICON ESEY MESTER INTERESA BO Hende cu ta haya cu Dios ta cruel no ta sinti nan atrai na dje.

Rocío, cu ta biba na Mexico, a bisa: “For di tempo mi tabata chikito nan a siña mi di un fierno di candela. Mi tabatin asina tanto miedo di Dios cu mi no a kere cu e tin bon cualidad. M’a pensa cu semper e ta rabia y cu e no ta tolera nada.”

Loke Bijbel ta bisa realmente tocante e huicionan di Dios y e condicion di e mortonan a yuda Rocío haya un otro impresion di Dios. El a bisa: “Mi a sinti un alivio—comosifuera un peso grandi a kita for di mi lomba. Mi a cuminsa kere cu Dios kier lo mihor pa nos, cu e stima nos y cu ami tambe por stim’e. E ta manera un tata cu ta tene man di su yiunan y kier lo mihor pa nan.”—Isaias 41:13.

Miedo di fierno di candela a pone hopi hende trata na hiba un bida devoto, pero Dios no kier pa nos sirbie pa motibo di miedo. Hesus mes a bisa: “Bo tin cu *stima* Jehova bo Dios.” (Marco 12: 29, 30) Ademas, ora nos realisa cu Dios no ta inhusto, nos por confia tambe den su huicionan di futuro. Si, mescos cu Eliu, amigo di Job, nos tambe lo por bisa cu tur confianza: “Leu sea di Dios di haci maldad, y di e Todopoderoso di comete inikidad.”—Job 34:10.

E Berdad Por Haci Bo Liber

Un dia, ora Hesus tabata na Jerusalem, el a papia di su Tata, Jehova, y a saca na cla e hipocresia di e lidernan religioso di e tempo ey. (Juan 8:12-30) Loke el a bisa eynan ta siña nos a base di kico nos mester analisa loke hende ta kere tocante Dios. El a bisa: “Si boso keda fiel na mi palabranan, boso realmente ta mi discipelnan, y boso lo conoce e berdad, y e berdad lo haci boso liber.”—Juan 8:31, 32.


Ora Hesus a bisa “si boso keda fiel na mi palabranan”, el a duna nos e clave pa determina si un siñansa religioso ta “berdad” of no. Pues, ora un hende bisa bo algo di Dios, puntra bo mes: ‘E ta cuadra cu loke Hesus a bisa y cu otro partinan di e Santo Escritura?’ Imita esnan cu a tende apostel Pablo papia y cu ‘tabata analisa e Escritura tur dia pa wak si e cosnan cu nan tabata siña tabata berdad.’—Echonnan 17:11.

Esey ta loke Marco, Rosa y Raymonde, menciona den e prome articulo di e serie aki, a haci. Nan a analisa nan creencianan a base di nan estudio di Bijbel cu Testigonan di Jehova. Con loke nan a siña a beneficia nan?

Marco: “E Testigo cu a siña nos tocante Bijbel a uza e Escritura pa contesta tur e preguntanan cu ami cu mi esposa tabatin. Nos amor pa Jehova a crece y nos relacion cu otro como esposo y esposa a bira mas fuerte.”

Rosa: “Na principio, mi a kere cu Bijbel ta simplemente un buki di filosofia cu ta purba di splica pa medio di conceptonan humano ken Dios ta. Ma cu tempo mi a bin haya contesta pa mi preguntanan den Bijbel. Awor, Jehova ta un persona real pa mi, uno cu mi por confia.”

Raymonde: “Mi a resa pidi Dios pa e yuda mi siña conoc’e. Un poco tempo despues ami cu mi esposo a cuminsa studia Bijbel. Porfin nos a siña e berdad tocante Jehova! Nos a bira masha contento ora nos a haya sa ki clase di Dios e ta.”



Bijbel ta bay hopi mas leu cu simplemente saca e mentiranan tocante Dios na cla; tambe e ta papia di su bunita cualidadnan. E ta su Palabra inspira y ta yuda ‘nos comprende e cosnan cu Dios bondadosamente a duna nos’, esta, un mihor comprendemento di e berdad y e proposito di Dios. (1 Corintionan 2:12) Pakico no comproba pa bo mes con Bijbel ta contesta e preguntanan cu hende sa haci encuanto Dios, e proposito di bida y nos futuro? Bo por lesa algun di e contestanan aki riba www.jw.org bou di “Bible Teachings > Bible Questions Answered.” Tambe bo por pidi un estudio di Bijbel riba e website of cerca un Testigo di Jehova. Nos ta sigur cu si bo haci esey, lo bo ripara cu ta posibel pa stima Dios. ■



Papia cu Bo Yiu Adolescente sin Discuti cu Ne

*“Tempo mi yiu muher tabatin 14 aña, el a cuminsa pusta boca cu mi. Si mi a bis’e: ‘Bo ta bin come?’, e tabata contesta: ‘Mi ta come ora mi kier.’ Si mi a puntr’e si el a caba di haci su trabounan di cas, e tabata bisa: ‘Stop di cansa mi!’ Hopi biaha nos tabata halsa bos y grita otro.”—MAKI, JAPON.**

Si bo tin un yiu adolescente, un di e cosnan di mas dificil cu bo por haya bo aden como mayor ta ora bo haya un conflicto cu ne. Tambe e por pone bo pasenshi na prueba. Maria, mama di un hoben di 14 aña di Brazil, a bisa: “Ora mi yiu muher reta mi autoridad, e ta pone mi sanger herbe. Nos ta bira asina frustra te cu nos ta cuminsa grita otro.” Carmela, di Italia, ta enfrenta un reto similar. El a bisa: “Ami cu mi yiu homber sa discuti fuertemente cu otro, y ta te ora e bay cera su curpa den camber, e cos ta caba.”

Pakico algun adolescente ta gusta pusta boca cu nan mayornan? Mester culpa e personanan di nan mes edad? Kisas. Bijbel ta bisa cu un persona su

amigonan por tin un gran influencia riba dje, sea bon of malo. (Proverbionan 13:20; 1 Corintionan 15:33) Ademas, hopi di e entretenimento cu tin awe pa hobennan ta promove e idea cu no ta nada malo si un adolescente ta rebelde.

Pero tin otro factornan cu bo tin cu tene cuenta cu ne. Ta factornan cu no ta dificil pa trata cu ne unabes cu bo compronde ki efecto nan por tin riba bo yiu. Laga nos wak algun ehempel.

E TA DESAROYANDO SU “CAPACIDAD DI PENSA”

Apostel Pablo a skirbi: “Tempo mi tabata mucha, mi tabata papia manera mucha, pensa manera mucha, rasona manera mucha; pero awor cu mi a bira hende grandi, mi a pone cos di mucha un

* A cambia e nombrenan den e articulo aki.

banda.” (1 Corintionan 13:11) Manera e palabranan aki ta indica, mucha no ta pensa manera hende grandi ta pensa. Den ki manera?

Mucha tin e tendencia di pensa cu un cos ta sea bon of malo; na moda di papia, sea blanco of preto. En cambio, hende grandi hopi biaha ta mas capaz pa mira e areanan shinishi y analisa asunto nan mas a fondo pa nan por yega na un conclusion of tuma decision. Por ehempel, hende grandi ta para keto na e partinan etico di un asunto y ta pensa riba ki efecto nan accionnan por tin riba otro hende. Kisas nan tin e custumber di pensa asina, mientras cu adolescentenan ta den e proceso di siña pensa asina.

Bijbel ta anima hobennan pa desaroya nan “discernimento”, of, capacidad di pensa. (Proverbionan 1:4) En realidad, Bijbel ta anima *tur* cristian pa uza nan “capacidad di pensa.” (Romanonan 12: 1, 2; Hebreonan 5:14) Pero tin biaha bo yiu adolescente por uza su capacidad di pensa pa discuti cu bo, hasta riba cosnan hopi insignificante.* Of kisas e ta expresa un punto di bista cu ta refleha un falta di madurez. (Proverbionan 14:12) Den un situacion asina, con bo por rasona cu bo yiu en bes di discuti cu ne?

PURBA ESAKI: Podise bo yiu simplemente ta purba di uza su habilidad nobo di rasona, y kisas ainda e no tin un punto di bista firme riba un asunto. Pa bo haya sa kico e ta kere realmente, elogi’e y prome pa su manera di rasona riba e asunto. Por ehempel, bo por bis’e: “Aunke mi no ta di acuerdo cu bo riba tur punto, mi ta gusta e manera cu bo ta analisa cosnan.” Anto, yud’e evalua su forma di pensa. Bo por bis’e: “Bo ta kere cu loke bo a caba di bisa mi ta conta den *tur* situacion?” Bo por keda sorprendi con bo yiu ta reevalua su opinionnan y despues refina nan.

Pero tene cuidou! Ora bo ta rasona cu bo yiu, no kere cu ta abo mester tin e ultimo palabra. Hasta ora bo pensa cu loke bo bisa ta drenta un banda di horea y sali for di e otro banda, probablemente bo yiu lo keda corda mas di loke bo ta kere, of di loke e ta dispuesto pa reconoce. No keda sorprendi si

* E principianan cu nos ta analisa den e articulo aki ta conta tanto pa mucha homber como mucha muher.

despues di un par di dia, bo yiu acepta bo punto di bista of hasta pretende cu e idea tabata di dje.

“*Tin biaha ami cu mi yiu homber ta discuti tocante cualkier coy kens, por ehempel, p’e no dispidi cos of p’e stop di tenta su ruman muher. Pero mayoria di biaha, tur loke e tabata kier ta pa mi puntr’e su opinion, pa mi trata di comprond’e y pa mi bisa algo manera: ‘Awor mi ta compronde’ of ‘Ta esey ta loke bo ta pensa.’ Ora mi wak bek, mi ta realisa cu si mi a djis bisa algo den e direccion ey, nos lo por a evita hopi discusion.*”—Kenji, Japon.

E TA FORMANDO SU MES OPINIONAN

Un parti importante den lantamento di un yiu ta pa prepar’e pa e dia cu e ta bay biba riba su mes. (Genesis 2:24) Parti di e proceso ey ta encera yud’e forma su propio identidad, esta, su cualidadnan, su opinionnan y su norma- y balornan den bida cu ta determina ki tipo di hende e ta. Ora e haya su mes bou di presion pa haci malo, e echo cu e sa kico e kier den bida ta yud’e pensa riba e consecuencianan di su accionnan. Tambe lo e puntra su mes: ‘Ki tipo di hende mi ta? Kico ta mi norma- y balornan? Kico un persona cu tin e norma- y balornan ey lo haci den e situacion aki?’—2 Pedro 3:11.

Bijbel ta conta nos tocante Jozef, un yoncuman cu tabatin su propio identidad. Por ehempel, ora e esposa di Potifar a insisti pa e drumi cu ne, Jozef a contesta: ‘Con mi por haci e maldad grandi aki y peca contra Dios?’ (Genesis 39:9) Aunke ainda e Israelitanan no tabatin un ley cu a prohibi adulterio, Jozef por a compronde kico Dios a pensa di e asunto. Ademá, ora el a bisa ‘*con mi por*’, el a demostra cu e tabata pensa manera Dios, esta, cu ta asina e mes tambe tabata.—Efesionan 5:1.

Bo yiu adolescente tambe ta formando su propio identidad. Esey ta bon, pasobra su conviccionnan lo yud’e enfrenta presion di personanan di su mes edad. (Proverbionan 1:10-15) Di otro banda, e mesun sentido di identidad ey por pon’e lanta contra *bo*. Si esey sosode, kico bo por haci?

PURBA ESAKI: En bes di cuminsa discuti cu bo yiu, simplemente ripiti su palabranan. “Laga mi haci sigur si mi a compronde bo bon. Bo ta bisando mi cu ...?” Anto hacie pregunta manera: “Dicon bo



Mayornan sabi ta crea un ambiente den cua nan yiunan por expresa nan opinion

ta pensa asina?” of “Kico ta pone bo yega na e conclusion ey?” Stimula bo yiu pa e papia. Lag’e duna su opinion. Si e diferencia di opinion ta djis un asunto di preferencia y no un asunto di principio, muestra bo yiu cu bo por respeta su punto di bista, hasta ora bo no ta completamente di acuerdo cu ne.

Ora un yiu ta desaroya su propio identidad, acompaña pa conviccionnan firme, esey no ta solamente normal sino tambe probechoso. Al fin y al cabo, Bijbel ta bisa cu cristiannan no mester ta manera mucha chikito cu ta ser ‘benta tur caminda pa ola y hiba p’aki p’aya pa tur biento di siñansa.’ (Efesionan 4:14) Pues, permiti y hasta anima bo yiu pa e desaroya su propio identidad.

“Ora mi muestra mi yiu muhernan cu mi ta dispuestu pa scucha nan, nan ta mas inclina na tene cuenta cu mi opinion, incluso si e ta diferente for di esun di nan. Ademas, mi ta tene cuidou pa mi no obliga nan pensa manera ami ta pensa, sino ta laga nan forma nan propio opinion.”—Ivana, Republica Checo.

FIRME, ALABES FLEXIBEL

Algun adolescente ta gusta haci loke mucha sa haci. Nan a siña e arte di keda papia riba un asunto cu e intencion di cansa nan mayornan pa nan sede. Si esey ta sosode cu frecuencia den bo ho-

gar, tene cuidou. Aunke bo por haya alivio un rato si bo sede, bo yiu por haya e impresion cu pa e haya su kier, e tin cu keda insisti. Kico ta e solucion? Sigui e consejo di Hesus: ‘Laga bo “si” ta si, y bo “no”, no.’ (Mateo 5:37) Si bo yiu sa cu bo ta consistente, lo e ta menos inclina na insisti riba un punto.

Na mes momento, sea rasonabel. Por ehempel, laga bo yiu splica bo pakico e ta pensa cu e por yega cas mas laat na cierto ocasion. Si bo bisa si den un caso asina, esey no ta nifica cu ta sede bo ta sede na presion, sino bo ta simplemente sigui e consejo di Bijbel: ‘Laga tur hende mira ki rasonabel bo ta.’—Filipensenan 4:5.

PURBA ESAKI: Tene un reunion cu e famia den cua bo ta papia riba ki ora bo yiunan mester ta na cas y riba otro reglanan di cas. Muestra nan cu bo ta dispuesto pa scucha y pa evalua tur factor envolvi prome cu bo tuma un decision. Roberto, un tata di Brazil, a bisa: “Un yiu mester por mira cu su mayornan ta dispuesto pa sede ora ningun principio di Bijbel ta ser viola.”

Claro cu ningun mayor no ta perfecto. Bijbel ta bisa: “Nos tur ta tropica hopi biaha.” (Santiago 3:2) Si bo ta haya cu bo tambe tabata culpabel pa un discusion entre abo cu bo yiu, no keda sin pidie despena. Ora bo admiti bo fayto, bo ta duna un ehempel di humildad, y esey lo siña bo yiu actua na e mesun manera.

“Un biaha, mi a discuti fuertemente cu mi yiu. Ma despues cu mi a logra tranquilisa mi mes, mi a pidie despena pa loke a pasa. Como resultado, e tambe a calma y tabata mas facil pa e scucha mi.”—Kenji, Japon. ■

PUNTRA BO MES ...

- Den ki maneranan mi mes ta causando discusion cu mi yiu adolescente?
- Con mi por uza e informacion den e articulo aki pa compronde mi yiu mihor?
- Kico mi por haci pa papia cu mi yiu sin discuti cu ne?

Dios Ta Recompensa Hende Cu Ta Haci Esfuerzo pa Busc'e

Jehova ta balora e esfuerzo di hende cu ta trata di agrad'e? Algun hende ta bisa cu no, pasobra segun nan Dios no ta interesa den nos. Pero e punto di bista ey ta demostra cu nan no conoce Dios bon. Su Palabra, Bijbel, ta sigura nos cu Jehova ta interesa den e esfuerzo sincero di cada un di su sirbidornan. Analisa e palabranan di apostel Pablo cu nos ta haya na **Hebreonan 11:6**.

Kico nos tin cu haci pa agrada Jehova? Pablo a skirbi: "Sin fe ta imposibel pa agrada Dios." Tuma nota cu Pablo no ta bisa cu sin fe ta *dificil* pa agrada Dios, sino cu ta *imposibel* pa agrada Dios. Cu otro palabra, pa hende por agrada Dios, nan mester tin fe.

Pero kico fe den Dios ta encera? E ta encera basicamente dos cos. Na prome luga, nos "mester kere cu e ta existi." Pasobra con nos por agrada Dios si nos ta duda cu e ta existi? Pero kere so no ta suficiente, pasobra hasta e demoñonan ta kere cu Dios ta existi. (Santiago 2:19) Nos fe cu Dios ta existi mester motiva nos pa hiba un bida cu ta agrad'e.—Santiago 2:20, 26.

Na di dos luga, nos "mester kere cu" Dios ta "recompensa" hende. Un hende cu tin berdadero fe ta plenamente convenci cu su esfuerzo pa agrada Dios lo no ta envano. (1 Corintionan 15:58) Con nos por agrada Jehova si nos ta duda den su capacidad of deseo pa recompensa nos? (Santiago 1:17; 1 Pedro 5:7) Pues, si nos ta pensa cu Dios no ta interesa den nos, cu e no ta balora nos y cu e no ta generoso, nos no conoce e Dios cu Bijbel ta papia di dje.

Ken Jehova ta recompensa? Pablo a bisa: "Esnan cu ta haci esfuerzo pa busc'e." Un buki di

consulta pa traductornan di Bijbel ta bisa cu e palabra Griego traduci como "haci esfuerzo pa busc'e" no ta nifica simplemente "bay busca" Dios. Mas bien, e ta nifica acerca Dios "pa ador'e." Un otro buki di consulta ta splica cu e verbo Griego aki ta encera intensidad y esfuerzo vigoroso. Si, Jehova ta recompensa tur hende cu ta laga nan fe motiva nan pa sirbie cu celo y un amor intenso.—Mateo 22:37.

Con nos por agrada Jehova si nos ta duda den su capacidad of deseo pa recompensa nos?

Ki recompensa Jehova ta ofrece hende cu ta sirbie fielmente? El a priminti nan un futuro briyante: bida eterno den un paradijs aki riba tera. Esta un muestra di su gran amor y generosidad! (Revelacion 21:3, 4) Pero for di awor, tur hende cu ta haci esfuerzo pa busca Jehova ta ricibi hopi bendicion. Cu yudansa di su spirito santo y e sabiduria cu tin den su Palabra, nan ta disfruta di un bida feliz y yen di satisfaccion.—Salmo 144:15; Mateo 5:3.

En berdad, Jehova ta un Dios cu ta balora e sirbishi fiel di hende cu ta devoto na dje. Awor cu bo sa esaki, bo no ta sinti un deseo di hala cerca Dios? Nos ta anima bo anto pa siña mas tocante con bo por desaroya e clase di fe cu Jehova ta recompensa ricamente. ■

PA LUNA DI NOVEMBER NOS TA RECOMENDA BO LESA
Tito 1–Santiago 5



Dios A ‘Declar’e Husto pa Medio di Obra’

RAHAB tabata loer for di su bentana segun cu e prome rayonan di solo a sali na Jerico. Un ehercito invasor a lanta un campamento eyfo; tabata e soldaatnan di Israel. Ora nan a cuminsa marcha un biaha mas rond di e stad, nan a lanta un nubia di stof nan tras y a supla nan cachonan cu a keda resona.

Rahab tabata biba na Jerico; e tabata conoce tur e cayanan, casnan, plasanan druk y centronan comercial di e stad aki. Tambe e tabata conoce su habitantenan bon. E por a sinti cu dia pa dia nan tabata haya mas miedo segun cu e Israelitanan tabata efectua un rito straño: Nan tabata marcha rond di e stad un biaha pa dia. Ora e zonido di cacho tabata resona den e cayanan y plenchinan di Jerico, Rahab si no a sinti e miedo y angustia cu e hendenan di e stad tabata sinti.

Rahab tabata wak door di bentana ora e ehercito a cuminsa marcha mainta trempan riba e di shete dia. Meymey di e soldaatnan Israelita, el a mira nan sacerdotenan supla cacho y carga e arca sagrado cu a representa e presencia di nan Dios, Jehova. Nos por imagina con Rahab tabatin un cabuya cora teni, colga na su bentana, cu tabata na e parti pafo di e muraya di Jerico. E cabuya ey a recorda Rahab di e speransa cu e tabatin pa e cu su famia sobreviví e destruccion di e stad. Acaso Rahab tabata un traidor? Pa Jehova, sigur cu no! Jehova a mir’e como un muher cu tabatin un fe remarcabel. Laga nos bay bek na cuminsamento di e relato di Rahab y mira kico nos por siña for di dje.

E PROSTITUTA RAHAB

Rahab tabata un prostituta. E detaye ey a shock algun comentarista di Bijbel asina tanto cu nan a prefera di kere cu Rahab tabata simplemente e encargado di un posada. Pero Bijbel no ta sconde e berdad. (Josue 2:1; Hebreonan 11:31; Santiago 2:25) Den e comunidad di Canaan, probablemente e hendenan tabata tolera e profesion di Rahab. Pero, no ta semper un cultura ta influencia un hende su consenshi, esta, e sentido interior di loke ta bon y loke ta malo, cu Jehova a duna nos tur. (Romanonan 2:14, 15) Ta pesey kisas Rahab mes lo tabatin berguensa di su profesion. Podise, mescos cu hopi hende awe cu ta den e mesun situacion, el a sinti cu e no tabatin salida, y cu e no tabatin otro alternativa pa cuida su famia.

Rahab sigur a anhela un mihor bida. Den su tera natal tabatin hopi violencia y tur tipo di degradacion, incluso incesto y bestialidad. (Levitico 18:3, 6, 21-24) Religion a causa gran parti di e practicanan repugnante ey. Den e tempelnan nan tabata fomenta ritonan di prostitucion, y e adoracion di dios falso manera Baal y Molek a inclui kimamento di yiu bibo den sacrificio di candela.

Jehova no a cera wowo pa loke tabata pasa na Canaan. Ta pa motibo di e barbaridadnan ey mes, Jehova a bisa: “E tera ta impuro, y lo mi trece castigo riba dje pa su eror y e tera lo saca su habitantenan afo.” (Levitico 18:25, NW) Kico e “castigo” ey a encera? Jehova a duna Israel e promesa aki: “SEÑOR bo Dios lo saca e nacionnan aki for di bo

Rahab
a pone fe
den e Dios di
e Israelitanan



dilanti.” (Deuteronomio 7:22) Hopi siglo prome, el a priminti cu lo e duna e descendientenan di Abraham e tera aki, y “Dios ... no por gaña.”—Tito 1:2; Genesis 12:7.

Sinembargo, Jehova a decreta tambe cu algun pueblo di e tera lo mester a desaparce completamente. (Deuteronomio 7:1, 2) Como e “Hues di henter mundo”, el a mira kico nan tabatin den nan curason y tabata sa con perverso nan tabata. (Genesis 18:25; 1 Cronicanan 28:9) Con e bida di Rahab lo tabata den un di e stadnan condena ey? Nos por imagina nos con lo e mester a sinti su mes ora el a tende di e Israelitanan. El a haya sa cu e Dios di Israel a guia su pueblo—un nacion di catibo oprimi—na un victoria aplastante riba e ehercito di Egipto, e potencia militar di mas grandi den e mundo di e tempo ey. Y awor e mesun nacion ey, Israel, tabata a punto di ataca Jerico. Pero e hendenan di e stad ey a sigui den nan maldad. Nos por compronde dicon Bijbel ta bisa cu e compatriotanan di Rahab tabata ‘desobediente.’—Hebreonan 11:31.

Rahab si tabata diferente. Den transcurso di añanan, lo e mester a pensa riba e informenan cu el a tende tocante Israel y nan Dios, Jehova. Ki diferente Jehova tabata di e diosnan Cananeo! E tabata un Dios cu a lucha pa su pueblo, en bes di oprimi nan; el a eleva e normanan moral di su sirbidornan, en bes di rebaha nan. E Dios aki a duna balor na hende muher y no a mira nan como obheto sexual cu otronan por a cumpra, bende y

degrada den ritonan perverso. Ora Rahab a haya sa cu e Israelitanan a yega Riu Jordan y cu nan a prepara un atake, e lo mester a sinti miedo pa loke esey lo por a nifica pa su pueblo. Jehova a tuma nota di e muher aki? El a mira algo bon den dje?

Awe, tin hopi hende manera Rahab. Nan ta sinti nan atrapa den un estilo di bida cu ta caba cu nan dignidad y goso den bida; nan ta sinti un bashi y sin balor propio. E storia di Rahab ta un consuelo pa nos tur pasobra e ta laga nos mira cu Dios ta tuma nota di tur hende. Maske con indigno nos por sinti nos mes, “e [si] no ta masha leu for di cada un di nos.” (Echonan 17:27) E ta hopi cerca di nos, cla y ansioso pa duna speransa na tur esnan cu ta pone nan fe den dje. Esey a conta pa Rahab tambe?

EL A RICIBI E SPIONNAN

Riba un dia, poco prome cu e Israelitanan a marcha rond di Jerico, dos hende straño a yega na porta di Rahab. E dos hombernan kier a pasa sin cu ningun hende a tuma nota di nan, pero como cu e habitantenan di e stad tabata den tension, nan lo tabata alerta pa cualkier posibel spion di Israel. Rahab tambe tabata alerta; e lo a mira di biaha ken nan tabata. No tabata nada straño p’e ricibi hende desconoci na su porta, pero e dos hombernan aki tabata interesa solamente den un luga di keda, no den e servicionan di un prostituta.

En realidad, nan tabata spion di e campamento di Israel. Josue, nan comandante, a manda nan

bay wak kico tabata e puntonan fuerte y e puntonan debil di Jerico. Esey tabata e prome stad di Canaan cu e Israelitanan mester a invadi, y kisas esun di mas poderoso di nan tur. Josue kier a sa kico tabata spera e cu su hombernan. E spionnan sigur no a yega e cas di Rahab pa casualidad. Na un luga asina, esta na cas di un prostituta, otronan lo no a ripara facilmente cu nan tabata hende stranño. Kisas nan a spera tambe di haya cualkier informacion util for di combersacion di hende cu tabata papia sin pensa.

Bijbel ta bisa cu Rahab “a ricibi e mensaheronan hospitalariamente.” (Santiago 2:25) El a tuma nan den su cas, y si e tabata sospecha ken nan tabata y pakico nan tabata eynan, toch el a laga nan keda. Podise e tabatin gana di haya sa mas tocante nan Dios, Jehova.

Pero diripiente algun mensahero di e rey di Jerico a yega. Rumor tabata core cu tabatin spion di Israel den cas di Rahab. Kico Rahab lo a haci? Si el a proteha e dos enemigonan aki, esey lo no a pone su mes y henter su famia na peliger? E hendenan di Jerico lo no a mata nan? Di otro banda, Rahab entretanto tabata sa bon bon ken e hombernan aki tabata. Si e tabata sa caba cu e Dios di Israel tabata hopi mas mihor cu su diosnan, esaki lo no tabata un bon oportunidad p’e tuma parti pa Jehova?

Rahab no tabatin mucho tempo pa pensa, pero e tabata ingenioso y a actua lihe. El a sconde e spionnan entre un boshi di taki di mata di lino cu tabata seca riba dak di su cas. Anto el a bisa e mensaheronan di e rey: “Si, e hombernan a bin cerca mi, ma mi no tabata sa di unda nan tabata. Y a sosode cu ora a bira scur y a yega tempo pa cera porta di stad, e hombernan a sali bay; mi no sa unda e hombernan a bay. Bay lihe nan tras, y boso lo alcanza nan.” (Josue 2:4, 5) Rahab lo a keda observa cara di e mensaheronan di e rey. Acaso nan a ripara cu e tabatin miedo?

Rahab a nek nan! E hombernan di e rey a sali na careda den direccion di Riu Jordan, na e area caminda hende por a crusa e riu. (Josue 2:7) Rahab lo mester a sinti un alivio. Cu un strategia simpel, el a logra despista e asesinonan ey cu no tabatin derecho di sa e berdad, y asina el a scapa bida di e sirbidornan inocente di Jehova.

Rahab a core bay bek riba dak p’e bisa e dos spionnan kico el a haci. Tambe el a revela un dato crucial: Su pueblo a perde animo y tabata morto spanta di e invasornan. Esey si tabata bon noticia pa e spionnan! Nan lo a keda hopi contento di tende esey. E Cananeonan malbado ey a haya miedo di e poder di Jehova, e Dios di Israel. E ora ey Rahab a revela algo mucho mas importante pa nos. El a bisa: ‘Jehova bosu Dios ta Dios ariba den

Rahab a sconde dos sirbidor di Jehova entre un boshi di taki di mata di lino, poniendo su bida na peliger



cielo y abou na tera.’ (Josue 2:11) E informenan tocante Jehova cu a yega na su horea tabata suficiente pa sigur’e cu e Dios di Israel a merece su confianza. Pesey el a pone fe den Jehova.

No tabatin duda den mente di Rahab cu Jehova lo a duna su pueblo victoria. Pesey el a roga e spionnan pa tene misericordia di nan y spaar bida di e cu su famia. E spionnan a bay di acuerdo, pero nan a bis’e cu e mester a warda e secreto ey y cu e mester a colga un cabuya cora for di su bentana den e muraya di e stad. Di e manera ey, e soldaatnan lo por a proteha e cu su famia.—Josue 2: 12-14, 18.

E caso di Rahab ta siña nos un berdad fundamental tocante fe. Manera Bijbel ta indica, “fe ta bin despues cu un hende tende e palabra.” (Romanonan 10:17) Rahab a tende informenan confiabel tocante e poder y husticia di Jehova Dios, y pesey el a pone fe y confianza den dje. Awe nos tin mucho mas conocimiento di Jehova. Anos ta busca pa sa mas di dje y ta laga loke nos siña den su Palabra motiva nos pa pone fe den dje?

E MURAYA DI JERICO TA BASHA DEN OTRO

E dos spionnan a sigui Rahab su conseho pa baha bay abou via di un cabuya colga for di su bentana, y despues nan a core bay den direccion di e seronan. Ey, na parti noord di Jerico, tabatin hopi cueba caminda nan por a sconde te ora tabata safe pa bolbe bek na e campamento Israelita cu e bon noticia cu Rahab a duna nan.

Mas despues, e pueblo di Jerico sigur lo a tembla di miedo ora nan a tende con Jehova a haci un milager pa stop Riu Jordan di core, pa permiti Israel crusa riba e fondo seco di e riu. (Josue 3:14-17) Pero pa Rahab, e noticia ey tabata un prueba mas cu el a haci bon di pone confianza den Jehova.

Anto a bin e dianan largo cu Israel a marcha rond di Jerico: seis dia, un rond pa dia. E di shete dia si tabata diferente. Manera e introduccion di e articulo aki a trece padilanti, e marcha a cuminsa ora solo a sali, y despues cu e ehercito a marcha un biaha rond di e stad, el a sigui marcha rond di Jerico varios biaha mas. (Josue 6:15) Kico e Israelitanan tabata haciendo?

Finalmente, ora e ehercito a caba di dal e di shete rond riba e di shete dia, el a para keto. E Israelitanan a stop di supla e cachonan. A reina un silencio. Paden di e stad lo mester tabatin un tension enorme. Anto, diripiente, riba indicacion di Josue, e soldaatnan di Israel a laga nan stem resona pa prome biaha y a dal un grito masha duro. Acaso e guardianan cu tabata riba e muraya di Jerico a pensa cu esaki tabata un otro tipo di atake? No a dura hopi pa nan a haya sa esey. E muraya masivo a cuminsa tembla bou di nan pia. El a sacudi, scheur y despues basha abou completamente. Pero segun cu e nubia di stof tabata baha, tabata bisto cu parti di e muraya a keda intacto. E cas di Rahab a keda para su so como un testimonio di su fe. Imagina bo con lo el a sinti su mes ora el a mira con Jehova a proteh’e.* Su famia a scapa!—Josue 6: 10, 16, 20, 21.

E pueblo di Jehova tambe a respeta Rahab pa motibo di su fe. Ora nan a mira cu su cas a keda para su so entre e ruinan di e muraya, nan tabata sa cu Jehova tabata cu e muher aki. Rahab cu su famia a sobreviví e ehecucion cu a bin riba e stad malbado ey. Despues di e bataya, e Israelitanan a permiti Rahab biba den cercania di nan campamento. Cu tempo, el a bira parti di e pueblo Hudiu. El a casa cu un homber cu tabata yama Salmon, y nan yiu homber, Boaz, a crece bira un homber cu un fe extraordinario. Boaz a casa cu Ruth, e Moabita.[#] (Ruth 4:13, 22) Rey David y despues, e Mesias mes, Hesucristo, a bin di e famia sobresaliente ey.—Josue 6:22-25; Mateo 1:5, 6, 16.

E storia di Rahab ta demostra cu pa Jehova ningun hende no ta insignificante. E ta mira nos tur y ta examina nos curason. Y ora e mira maske ta un chispa di fe manera esun cu Rahab tabatin, su curason ta yena di alegria. Rahab su fe a motiv’e pa tuma accion. Manera Bijbel ta bisa, Dios a ‘deklar’e husto pa medio di obra.’ (Santiago 2:25) Sin duda, su fe ta digno pa nos imita! ■

* Ta interesante pa nota cu Jehova a respeta e acuerdo cu e dos spionnan a cera cu Rahab.

[#] Pa mas informacion tocante Ruth cu Boaz, wak e articulonon “Imita Nan Fe” den *E Toren di Vigilancia* na Spaño di 1 di juli y 1 di october 2012.

Ken ta bay cielo, y kico nan lo bay haci eynan?

Miyones di hende ta spera di bay cielo ora nan muri. Hesus a bisa cu su fiel apostelnan lo bay biba den cielo. Prome cu su morto, el a priminti nan cu e ta bay prepara un luga pa nan cerca su Tata Celestial.—**Lesá Juan 14:2.**

Dicon hende lo ser resucita pa bay biba den cielo? Kico nan lo bay haci eynan? Hesus a bisa su apostelnan cu nan lo bira rey y cu nan lo goberna e tera.—**Lesá Lucas 22:28-30; Revelacion 5:10.**

Ta berdad cu tur bon hende ta bay cielo?

Mescos cu un pais ta ser goberna pa un grupo chikito di hende, e tera tambe lo ser goberna pa un grupo chikito di hende cu Hesus ta scoge pa bay biba den cielo. (Lucas 12:32) Bijbel ta bisa exactamente ta cuanto hende lo goberna hunto cu Hesus.—**Lesá Revelacion 14:1.**

No ta hende cu ta bay cielo so lo haya un recompensa. Tur hende cu ta fiel na Hesus su gobernacion lo biba pa semper den un paradijs aki riba tera. (Juan 3:16) Algun lo sobrevivi e destruccion di e era malbado aki y drenta den Paradijs. Otronan lo ser resucita pa biba den Paradijs.—**Lesá Salmo 37:29; Juan 5:28, 29.**

Hesus a prepara un luga den cielo pa algun di su siguidornan. Bo sa kico nan lo bay haci eynan?



Pa mas informacion, wak capitulo 8 di e buki aki, publica pa Testigonan di Jehova

Bo por download e buki aki for di e website www.jw.org

LESA ONLINE MAS PREGUNTA
CU BIJBEL TA CONTESTA



Download e revista aki y e edicionnan anterior gratis, disponibel na varios idioma



Bijbel disponibel online den mas o menos 50 idioma

Bay na www.jw.org of scan e codigo aki



wp.13.11/01-PAA
130826